

Products da bio en e dalla Surselva

Bettina Riedrich e Claudia Klaiss da Trun ein gia dapi biars onns consumentas da products da bio. Cumprar regional e stagional ei lur devisa. Per munconza da pussevladads han ellas dacuort lantschau sezzas ina distribuziun da products biologics cul num «surselva naturalmein».

SUSI ROTHMUND/FMR

Ton Bettina Riedrich sco Claudia Klaiss eran clientas regularas dalla fatschenta «Bein en pei» a Trun che purscheva igl onn vargau aunc ina pulita paletta products biologics. Suentar cuort temps ha quella denton puspei stuiu serrar las portas e Bettina Riedrich ei sedumandada co ella vegni ussa il meglier tier ses products desiderai. «La damonda per products da bio en e dalla Surselva ei avon maun. Per menar sur onn ina stizun basta la sviulta denton buc e perquei hai jeu tschercau ina alternativa», di la dunna da 47 onns. «Tgi ch'enquera anfla» pretenda in proverbi ed aschia eis ella vegnida sin l'idea da prender encunter empustaziuns ina ga al meins, empustar tiels producents e tiel commerzi dil fatg da bio mo quei che vegn effectivamein giasch, schar furnir a casa e la finfinala reparter en differents loghens da distribuziun.

Surselva naturalmein

Cun Claudia Klaiss ha Bettina Riedrich anflau ina partenaria da fatschenta cullas medemas ideas ed ensemen han ellas fundau la pintga interpresa «surselva naturalmein». Las dunnas han astgau sorprender la clientella da tschèp dalla stizun «Bein en pei» ed era ils contacts d'ina gronda part dils producents, culs quals ellas collavuran vinavon. «Empustar mo pigns quantums per nus sezzas cunvegness buc, culla nova soluziun savein nus era vender ils products e la clientella sa vinavon cumprar ella regiun», declaran las dunnas.

Vast sortiment

Sin lur pagina d'internet www.surselva-naturalmein.ch, fan ellas amogna in'entira paletta da products da bio. Quei ch'ei frestg e stagional vegn dalla regiun ed auters products san era vegnir da pli lunsch. Aschia tonscha il sortiment che cumpeggia ver 300 artechels naven da puorla da lavar entochen tier truffels e pasta. «Nus purschin quei survetsch per sezzas vegnir tier ils products desiderai, denton era per sensibilisar auters per l'entira problematica da consum. «Surselva naturalmein» stat per viver e consumar en harmonia culla natira, pil beineser da nus tuts e per ina megliera ecologia», puntuescha Claudia Klaiss ed aschunta ch'ellas sperien ch'adina dapli persunas seigien promtas da dar ora empauet dapli daners per products da bio e produci a moda faira.

Nutrimint integral

Claudia Klaiss ei vegetariana e s'occupa gia dapi varga 30 onns cul nutrimint integral. La dun-



Claudia Klaiss e Bettina Riedrich (da sen.) fan commerzi cun products da bio.



Ina pintga schelta dils rodond 300 products da «surselva naturalmein».

FOTOS SUSI ROTHMUND

na da 61 onns viva a Caltgadira sur Trun ed ei scolasta da cuschinar. Sco scolasta da yoga dat ella cuors ell'entira Surselva. Bettina Riedrich ei vegana e viva a Trun e Turitg. Ella ha studegiu historia d'art. Riedrich ei intermediadra d'art e curatura d'exposiziuns independenta e sa aschia era luvrar savens da casa anora. Dapi 2019 viva ella perquei per gronda part a Trun,

empren husliamein romontsch e legia era La Quotidiana. La distribuziun da products da bio organischeschan ellas sper lur lavur da mintgadi e dian: «Igl ei in project da perschasiun.» Ei mondi denton tuttavia buca per surplidar enzatgi mobein per la natira, per la sanadad e pil sesentir bein ed ei seigi impurtont che mintgina e mintgin anfla sez sia via.

CONCERT ANNUAL CUN TUNS DA TIBAS

Concert dil chor viril da Domat

Ils 29 d'avrel seprenta il Chor viril Domat ensemen cun sunatibas dall'Argovia sil palc ella halla Tircal a Domat.

Ch'igl ei insumma gartegiau da collavurar cun questa formaziun speciala ei d'engraziar a las colligiaziuns dil president dil chor, Ludwig Corray. Sia brit, ch'ei la suletta dunna ella gruppa dad otg dels, organischescha er ils concerts dils «Ländlerfrönde Freiamt». Aschia senumna questa formaziun da sunatibas.

Ei vegn pia a dar in concert annual multifar dil Chor viril Domat. «Il cant da chor e la musica da tibas ein fetg differents e gest perquei ordvart captivonts», di Andrés Heredia, il dirigent dils umens da Domat. Ensemen interpreteschan els la canzun populara svizra «Lueget vo Berg und Tal» e la canzun tirolese «Fein sein, beinander bleibn».

Era canzuns romontschas

Secapescha seprenta mintga formaziun lura era separadamein. Il chor viril Domat vegn a cantar canzuns romontschas enconuscentas e popularas sco p. ex. «Juhe, tgei legria» da Tuor/Erni ni «Vea, premeveira» da Cadotsch/Muoth. Quasi sco punct culminont presenta il chor viril durant siu bloc romontsch la canzun da marschar «Il paun palus» da Schmid v. Grüneck.

La litteratura da cant tudestga vegn presentada denter auter cun la canzun enconuscenta dil cumponist Hermann Sonnet, «Grüss mir

die Reben, Vater Rhein!». Cun «Sul Monte Bianco» deconta il chor era il scazi dallas canzuns talianas, meglier detg dil Trentino. (cdm/fmr)



Il chor viril Domat seprenta ensemen cun ils Ländlerfrönde Freiamt sonda, ils 29 d'avrel a las 20.00 uras ella halla plurivalenta a Domat.

TUJETSCH



Survesta sur la Val Tujetsch. Dumengi' ad otg elegia la vischnaunca ses gremis politics.

FOTO SEDRUN MUSTER TURISSEM

Candidats/as per la cumissiun da gestiun maunca

Martin Cavegn candidescha per in'ulteriura perioda d'uffeci sco president communal da Tujetsch. Per la cumissiun da gestiun mauncan tuts treis candidats per las tscharnas da dumengia, ils 7 da matg 2023.

HANS HUONDER/FMR

Las elecziuns communalas da quest onn a Tujetsch ein extraordinarias. Suentar ch'il pievel ha acceptau la nova constituziun communal ha la vischnaunca buca pli d'eleger il cussegl da vischnaunca. Ina reducziun dil diember da commembras e commembers dat ei tiel cussegl da scola. La constituziun communal revidida va en vigur igl empem da fenadur 2023. Lu entscheiva era la nova perioda d'uffeci dallas instanzas politics.

In genau ha demisisunau

Dalla suprastonza communal ei Renato Decurtins seretrats sil fin da zercladur. Sco successura dad el candidescha Désirée Wilimann. Il president communal Martin Cavegn ed ils geraus Nicole Giossi, Guido Monn e Daniel Schmid recandideschon per in'ulteriura perioda d'uffeci. Per l'elecziun dalla suprastonza communal ei il pli absolut necessaris, per la cumissiun da gestiun ed il cussegl da scola vala il pli relativ.

Treis candidat(a)s mauncan

Dalla cumissiun da gestiun ein Primus Deragisch, Baseli Huonder e Severino Solèr seretrats. Sco ins sa leger en La Tuatschina – igl organ da publicaziun uffical dalla vischnaunca da Tujetsch – eis ei reussiu d'anflar neginas candidatas e negins candidats per quei organ sil termin d'annunziau. Tuttina ein persunas che figureschan buca silla gliesta ufficala eligiblas ils 7 da matg 2023.

Sin fundament dalla constituziun nova ei il cussegl da scola vegnius reducuis sin treis persunas. Ina da quellas ei il representant dalla suprastonza communal che dirigia il departament da scola. Aschia ein d'occupar aunc dus posts. Per quels stattan Tania Loretz e Ronny Levy a disposiziun. Omisdus appartegnan gia al cussegl da scola.

SPITAL REGIONAL SURSELVA



Patrick Braun, caumiedi anestesia e menader medicinal dil Salvament Surselva, Daniel Steven, sanitari da salvament dipl., Simon Widmer, menader dil sector dil Salvament Surselva, Thomas Brunner, vicemeinagestiun IAS (da san.)

FOTO MAD

Salvament Surselva ei reconuschius

Il fevrer 2023 ei il Salvament Surselva, integraus el Spital regional Surselva, danovamein vegnius reconuschius dall'Interassociazion da salvament (IAS), e quei cun success, sco quei ch'il Salvament Surselva scriva en ina comunicaziun. L'IAS ei l'organiziun tetgala, incumbensada dils cantuns, dils survetschs da salvament medicinals dalla Svizra. L'organisaziun cumpeggia l'entira cadeina da salvament per tiara, ell'aua ed ell'aria naven dil liug digl accident tochen el spital. L'organisaziun definescha ils standards che valan per il salvament medicinal el mintgadi ed en situaziuns extraordinarias. Per retscheiver la reconuschientscha ei il Salvament Surselva vegnius examinaus els ils secturs dalla qualitat, dalla lavur e dils resultats dalla lavur. (cdm/fmr)